

tinerent, ipsi cederent: in reliquis se se regi fatis liberatim permittere: per eos qui rebus Gallicis Cardinales favebant, conscripta & obsignata ad illum misit. Pauloque post vocatis ad se legatis Ferdinandi & reipublicæ eis dixit, ne propter ea quæ fecisset perturbarentur, ne ve se priore contra Gallos voluntate ulla ex parte mutatum crederent: invitum enim ad id descendisse fallendi & consopendi regis causa. Quibus intellectis rebus Patres sciverunt, Julio scribi oportere: si cum Aloisio fœdus facere statuerit, se non recusare, dum in eo rempublicam includat, sociamque fœderis efficiat. Guidum Ragonium post hæc, qui e Gallorum custodia se redemerat, ad urbem venientem Patres amanter exceperunt, & præfectum equitum gravis armaturæ fecerunt: ejusque fratri Joanni Francisco, qui cum eo venerat, equitum leviorum præfecturam item tradita.

*Concilium
Lateranense.*

Romæ ad diem tertium nonarum maji Concilium celebrari cœptum est ab Julio in templo Lateranensi magna sacerdotum frequentia, precesque Deo Optimo Maximo, ut vota hominum rite nuncuparentur, factæ. Marco Cardinali Seduno, Venetiis qui erat, ad suos abeunti argentum in mensam dono a Patribus datum. Cum Henrico autem rege Britanniae fœdus a sociis atque a republica initum, XV. cal. junias in urbe celebratum est: concupivit enim rex petiitque se in eo recipi. Illis diebus Julius Vitellius Tifernatium Episcopus, qui conditionibus acceptis Ravennæ arcem Gallis obsidentibus tradiderat, eo cum copiis ad expugnandam illam rediens, traditis conditionibus recepit. Oppidani cladis suæ contra jus contra fas acceptæ memores, quatuor Gallorum præfectos in arce qui fuerant, fide non servata vivos sepelierunt cervicibus supra terram extantibus. Julii & Ferdinandi legati, itemque duo civitatis magistratus, Leonardus Mosenicus, Nicolaus Bernardus, Helvetiis se ad bellum contra Gallos comparantibus ex urbe profecti cum auri libris CXX. ad illos se contulerunt cohortandi & juvandi eos causa. Ii se Veronam Maximiliani præfectis libentissimis